

四庫全書

史部

欽定四庫全書

史記卷一百十一

漢 太 史 令司馬遷 撰

宋中郎外兵曹參軍裴 駟集解

唐國子博士弘文館學士司馬貞索隱

唐諸王侍讀率府長史張守節正義

衛將軍驃騎列傳第五十一

大將軍衛青者平陽人也其父鄭季為吏給事平陽侯

家與侯妾衛媼通

索隱衛姓也媼婦人老少通稱漢書曰與主家僮衛媼通案既云家僮故

知非老或者媼是年老之稱後追呼耳然外戚傳云薄姬父與魏王宗女魏媼通則少亦稱媼也而小顏云衛者舉其夫家姓也然案此云侯妾衛媼則似無夫下云同母兄衛長子及姊衛子夫皆冒衛氏又似有夫耳其所冒之姓為父與母皆未明也生青青同母兄衛長子而姊衛子夫自

平陽公主家得幸天子

集解徐廣曰曹參曾孫平陽夷侯時尚武帝姊平陽公主生子

襄索隱案如淳云本陽信長公主為平陽侯所尚故稱平陽公主世家及功臣表時或作疇漢書作壽竝文字殘缺故故冒姓為衛氏字仲卿長子更字長君長君母

號為衛媼媼長女衛孺

索隱漢書云君孺

次女少兒次女即子

夫後子夫男弟步廣

集解徐廣曰步一作少

皆冒衛氏青為侯家

人少時歸其父其父使牧羊先母之子

集解服虔曰先母適妻也青之

適母索隱漢書作民母顧氏云鄭季本妻編於民戶之間故曰民母今本亦或作民母也

皆奴畜之

不以為兄弟數

索隱音去聲

青嘗從入至甘泉居室

正義按居室署

名武帝改曰保宮灌夫繫居室是也

有一鉗徒

集解張晏曰甘泉中徒所居也

相青曰貴

人也官至封侯青笑曰人奴之生得毋笞罵即足矣安

得封侯事乎青壯為侯家騎從平陽主建元二年春青

姊子夫得入宮幸上皇后堂邑大長公主女也

集解徐廣曰堂

邑安侯陳嬰之孫夷侯午尚景帝姊長公主生子季須  
元鼎元年季須坐奸自殺正義文穎云陳皇后武帝姑  
也無子妬大長公主聞衛子夫幸有身妬之乃使人捕

青青時給事建章未知名

索隱案晉灼云建章上林中宮名也

大長公主

執四青欲殺之其友騎郎公孫敖與壯士篡取之以故

得不死

索隱篡猶劫也奪也

上聞乃召青為建章監侍中及同母

昆弟貴賞賜數日間累千金孺為太僕公孫賀妻少兒

故與陳掌通

集解徐廣曰陳平曾孫名掌也

上召貴掌公孫敖由此益

貴子夫為夫人青為太中大夫元光五年青為車騎將

軍擊匈奴出上谷太僕公孫賀為輕車將軍出雲中太  
中大夫公孫敖為騎將軍出代郡衛尉李廣為驍騎將  
軍出鴈門軍各萬騎青至龍城斬首虜數百騎將軍敖  
亡七千騎衛尉李廣為虜所得得脫歸皆當斬贖為庶  
人賀亦無功元朔元年春衛夫人有男索隱即衛太子據也立為  
皇后其秋青為車騎將軍出鴈門三萬騎擊匈奴斬首  
虜數千人明年匈奴入殺遼西太守虜略漁陽二千餘  
人敗韓將軍軍漢令將軍李息擊之出代令車騎將軍

青出雲中以西至高闕

索隱高闕山名小顏云一曰塞名在朔方之北也

遂略

河南地至于隴西捕首虜數千畜數十萬走白羊樓煩

王遂以河南地為朔方郡

正義今夏州也

以三千八百戶封青

為長平侯青校尉蘇建有功以千一百戶封建為平陵

侯使建築朔方城

正義括地志云夏州朔方縣北什賁故城是按蘇建築什賁之號蓋出蕃

語也青校尉張次公有功封為岸頭侯

索隱案晉灼云河東皮氏縣之亭名

也正義服虔云鄉名也

天子曰匈奴逆天理亂人倫暴虐老以

盜竊為務行詐諸蠻夷造謀藉兵數為邊害

集解張晏曰從蠻夷

借兵鈔  
邊也

故興師遣將以征厥罪詩不云乎薄伐獫狁至

于太原

索隱此小雅六月詩美宣王北伐也薄伐者言逐出之也

出車彭彭城彼朔

方

索隱小雅出車之詩也

今車騎將軍青度西河

正義即雲中郡之西河今勝州

東河也

至高闕獲首虜二千三百級車輜畜產畢收為鹵

已封為列侯遂西定河南地按榆谿舊塞

集解如淳曰按行也榆谿

舊塞名或曰按尋也索隱案水經云上郡之北有諸次山諸次水出焉東經榆林塞為榆谿是榆谿舊塞也

絕梓領梁北河

集解如淳曰絕度也為北河作橋梁正義括地志云梁北河在靈州界

討

蒲泥破符離

集解晉灼曰二王號索隱崔浩云北塞名

斬輕銳之卒捕服聽



者三千七十一級

集解張晏曰伏於隱處聽軍虛實

執訊獲醜

正義訊問也醜

衆言執其生口問之知虜處獲得衆類也

驅馬牛羊百有餘萬金甲兵而還

益封青三千戶其明年匈奴入殺代郡太守友

集解徐廣曰友

者太守名也姓共也

入略鴈門千餘人其明年匈奴大入代定襄

上郡殺略漢數千人其明年元朔之五年春漢令車騎

將軍青將三萬騎出高闕衛尉蘇建為遊擊將軍左內

史李沮

集解文穎曰音沮

為彊弩將軍太僕公孫賀為騎將軍

代相李蔡為輕車將軍皆領屬車騎將軍俱出朔方大

行李息岸頭侯張次公為將軍出右北平咸擊匈奴匈奴右賢王當衛青等兵以為漢兵不能至此飲醉漢兵夜至圍右賢王右賢王驚夜逃獨與其愛妾一人壯騎

數百馳潰圍北去漢輕騎校尉郭成等逐數百里不及

得右賢裨王十餘人

索隱賈逵云裨益也小顏云裨王小王也若裨將然音頻移反

衆

男女萬五千餘人畜數千百萬於是引兵而還至塞天

子使使者持大將軍印即軍中拜車騎將軍青為大將

軍諸將皆以兵屬大將軍大將軍立號而歸

索隱案謂立大將軍

之號令而歸也

天子曰大將軍青躬率戎士師大捷獲匈奴王

十有餘人益封青六千戶而封青子伉

正義曰浪反

為宜春

侯青子不疑為陰安侯青子登為發干侯青固謝曰臣

幸得待罪行間賴陛下神靈軍大捷皆諸校尉力戰之

功也陛下幸已益封臣青臣青子在緇祿中

正義襁長尺二寸闊

八寸以約小兒於背祿小兒被也

未有勤勞上幸列地封為三侯非臣

待罪行間所以勸士力戰之意也伉等三人何敢受封

天子曰我非忘諸校尉功也今固且圖之乃詔御史曰

護軍都尉公孫敖三從大將軍擊匈奴常護軍傳校獲

王索隱顧祕監云傳領也五百人謂之校小顏云傳音附言敖總護諸軍每附部校以致克捷而獲王也

以千五百戶封敖為合騎侯索隱案非邑地因戰功為號謂軍合驃騎故云合騎

若冠軍從都尉韓說從大將軍出窳渾集解徐廣曰窳驃然也

索隱服虔云窳渾塞名漢書作寘渾寘音田至匈奴右賢王庭為麾下搏戰

獲王索隱搏音博搏擊也小顏同今史記漢書本多作傳傳猶轉也以千三百戶封說

為龍頡侯騎將軍公孫賀從大將軍獲王以千三百戶

封賀為南窳侯集解徐廣曰窳宜作奄音匹孝反索隱韋昭云縣名或作窖字林云大下卯與

穴下卯竝  
音匹孝反

輕車將軍李蔡再從大將軍獲王以千六百

戶封蔡為樂安侯校尉李朔校尉趙不虞校尉公孫戎  
奴各三從大將軍獲王以千三百戶封朔為涉軹侯以  
千三百戶封不虞為隨成侯以千三百戶封戎奴為從  
平侯將軍李沮李息及校尉豆如意有功賜爵關內侯  
食邑各三百戶其秋匈奴入代殺都尉朱英其明年春  
大將軍青出定襄合騎侯敖為中將軍太僕賀為左將  
軍翕侯趙信為前將軍衛尉蘇建為右將軍郎中令李

廣為後將軍左內史李沮為彊弩將軍咸屬大將軍斬首數千級而還月餘悉復出定襄擊匈奴斬首虜萬餘人右將軍建前將軍信并軍三千餘騎獨逢單于兵與戰一日餘漢兵且盡前將軍故胡人降為翕侯見急匈奴誘之遂將其餘騎可八百犇降單于右將軍蘇建盡亡其軍獨以身得亡去自歸大將軍大將軍問其罪正

閔

集解張晏曰正軍正也閔名也

長史安

正義律都軍官史一人也

議郎周霸等

集解

徐廣曰儒生索隱案郊祀志議封禪有周霸故知儒生也

建當云何霸曰自大將軍

出未嘗斬裨將今建棄軍可斬以明將軍之威閼安曰  
不然兵法小敵之堅大敵之禽也今建以數千當單于  
數萬力戰一日餘士盡不敢有二心自歸自歸而斬之  
是示後無反意也不當斬大將軍曰青幸得以肺腑待  
罪行間不患無威而霸說我以明威甚失臣意且使臣  
職雖當斬將以臣之尊寵而不敢自擅專誅於境外而  
具歸天子天子自裁之於是以見為人臣不敢專權不  
亦可乎軍吏皆曰善遂囚建詣行在所

集解蔡邕曰天子自謂所居曰

行在所言今雖在京師行所至耳巡狩天下所奏事處  
皆為宮在長安則曰奏長安宮在泰山則曰奉高宮唯  
當時入塞罷兵是歲也大將軍姊子霍去病集解徐廣  
曰姊即少

兒年十八幸為天子侍中善騎射再從大將軍大將軍

受詔與壯士為剽姚校尉

索隱服虔音飄搖大顏案荀悅漢紀作票鷁票鷁勁疾之

貌也票音頻妙反鷁音弋召反

與輕勇騎八百直棄大軍數百里赴利

斬捕首虜過當

索隱案小顏云計其所將之人數則捕首虜為多過於所當也一云漢軍亡失

者少而殺獲匈奴數多故曰過當也

於是天子曰剽姚校尉去病斬首虜

二千二十八級及相國當戶斬單于大父行籍若侯產



集解張晏曰籍若胡侯索隱行音胡浪反謂籍若侯是匈奴祖之行第產即大父之名

生捕季父

羅姑比

索隱案顧氏云羅姑比單于季父名小顏云比頻也案下既云再無容更言頻也

再冠

軍以千六百戶封去病為冠軍侯上谷太守郝賢四從大將軍捕斬首虜二千餘人以千一百戶封賢為衆利侯是歲失兩將軍軍亡翕侯軍功不多故大將軍不益封右將軍建至天子不誅赦其罪贖為庶人大將軍既還賜千金是時王夫人方幸於上甯乘說大將軍曰將軍所以功未甚多身食萬戶三子皆為侯者徒以皇后

故也今王夫人幸而宗族未富貴願將軍奉所賜千金

為王夫人親壽大將軍乃以五百金為壽天子聞之問

大將軍大將軍以實言上乃拜甯乘為東海都尉張騫

從大將軍以嘗使大夏

正義今案大夏國在大宛之西

留匈奴中久導

軍知善水草處軍得以無饑渴因前使絕國功封騫博

望侯冠軍侯去病既侯三歲元狩二年春以冠軍侯去

病為驃騎將軍

集解徐廣曰驃一亦作剽正義漢書云霍去病征匈奴有絕幕之勲始置驃騎

將軍位在三司品秩同大將軍說將萬騎出隴西有功

文云驃騎黃馬鬣白色一曰髦尾

天子曰驃騎將軍率戎士踰烏鰐

集解駟案漢書音義曰音戾山名也

討

邀濮

索隱邀音速濮音卜崔浩云匈奴部落名案下有邀濮王則是國名也

涉狐奴

集解晉灼

曰水名也

歷五王國輜重人衆懾懾者弗取

集解文穎曰恐懼也索隱案說

文云懾懾失氣也劉氏云懾式涉反懾之涉反

冀獲單于子

集解徐廣曰一作與

轉戰六

日過焉支山千有餘里合短兵殺折蘭王斬盧胡王

集解

張晏曰折蘭盧胡國名也殺者殺之而已斬者獲其首正義顏師古云折蘭匈奴中姓也今鮮卑有其蘭姓者

即其種

誅全甲

集解徐廣曰全一作金正義全甲謂具足不失落也

執渾邪王子及

相國都尉首虜八千餘級收休屠祭天金人

集解如淳曰祭天為

主索隱案張晏云佛徒祠金人也屠音儲

益封去病二千戶其夏驃騎將軍

與合騎侯敖俱出北地異道博望侯張騫郎中令李廣俱出右北平異道皆擊匈奴郎中令將四千騎先至博望侯將萬騎在後至匈奴左賢王將數萬騎圍郎中令郎中令與戰二日死者過半所殺亦過當博望侯至匈奴兵引去博望侯坐行留當斬贖為庶人而驃騎將軍出北地已遂深入與合騎侯失道不相得驃騎將軍踰居延至祁連山捕首虜甚多天子曰驃騎將軍踰居延

集解張晏

遂過小月氏

索隱韋昭氏音支西域傳大月氏本居敦煌祁連間餘衆保南

山遂號

攻祁連山

索隱小顏云即天山也匈奴謂天為祁連案西河舊事謂白山即天山祈

連恐

得酋涂王

集解張晏曰胡王也索隱酋音才由反涂音徒漢書云揚武乎獫得得單于單

桓酋涂王此丈省也

以衆降者二千五百人斬首虜三萬二百級

獲五王五王母單于闐氏王子五十九人相國將軍當

戶都尉六十三人師大率

正義音律也

減什三

索隱案漢書作減什七小

顏云破匈奴之師十減其七一云漢兵亡失之數下皆類此案一說為是也

益封去病五千

戶賜校尉從至小月氏爵左庶長鷹擊司馬破奴再從

驃騎將軍斬遼漢王

正義速  
卜二音

捕稽且王

索隱且音  
子余反

千騎

將得王王母各一人

索隱漢書作右千騎將王然則此  
云千騎將是漢之將屬趙破奴得

匈奴王及王母也或云右  
千騎將即匈奴王號也

王子以下四十一人捕虜三

千三百三十人前行捕虜千四百人以千五百戶封破

奴為從驃侯

集解張晏曰從驃騎  
將軍有功因以為號

校尉句王高不識

集解

徐廣曰句音勾匈奴以為號  
索隱案二人竝匈奴人也

從驃騎將軍捕呼于屠王

索隱案三字  
共為王號

王子以下十一人捕虜千七百六十八人

以千一百戶封不識為宜冠侯

正義孔文祥云從冠軍  
將軍戰故宜冠從驃之

類者

校尉僕多有功封為煇渠侯

索隱案漢表作僕朋疑多是誤煇音暉也

合騎侯敖坐行留不與驃騎會當斬贖為庶人諸宿將

所將士馬兵亦不如驃騎驃騎所將常選

索隱選音宣變反謂驃騎

常選擇取精兵

然亦敢深入常與壯騎先其大將軍軍亦有天

幸未嘗困絕也然而諸宿將常坐留落不遇

索隱案謂遲留零落

不遇合也

由此驃騎日以親貴比大將軍其秋單于怒渾邪

王居西方數為漢所破亡數萬人以驃騎之兵也單于

怒欲召誅渾邪王渾邪王與休屠王等謀欲降漢使人

先遣使向邊境要遮漢人

索隱案謂先於邊境要侯漢人言其欲降

令報天

子要邊是時大行李息將城河上得渾邪王使即馳傳以聞天子聞之於是恐其以詐降而襲邊乃令驃騎將軍將兵往迎之驃騎既渡河與渾邪王衆相望渾邪王裨將見漢軍而多欲不降者頗遁去驃騎乃馳入與渾邪王相見斬其欲亡者八千人遂獨遣渾邪王乘傳先詣行在所盡將其衆渡河降者數萬號稱十萬既至長安天子所以賞賜者數十巨萬封渾邪王萬戶為漯陰



侯索隱漂音他合反案地理志縣名在平原封其裨王呼毒尼集解文頴曰胡王名為

下摩侯鷹庇為煇渠侯集解徐廣曰一篇警索隱漢書鷹作雁庇音必二反又音足

履反案漢書功臣表元狩二年以煇渠封僕朋至三年又封鷹庇其地俱屬魯陽未詳所以正義煇渠表作順

梁禽黎為河綦侯集解徐廣曰禽一作鳥索隱案表作鳥梨大當戶銅離集解

徐廣曰一作稠離也索隱徐注與漢書功臣表同此文云銅漢書云調字又異也為常樂侯於

是天子嘉驃騎之功曰驃騎將軍去病率師攻匈奴西

域王渾邪王及厥眾萌咸相犇率以軍糧接食并將控

弦萬有餘人誅獍狎集解晉灼曰獍音欺譙反索隱說文獍作獍行疾貌悍音胡旦反

獲首虜八千餘級降異國之王三十二人戰士不離傷

十萬之衆咸懷集服仍與之勞爰及河塞

正義言匈奴右地渾邪王

降而塞外並河諸郡之民無憂患也

庶幾無患幸既永綏矣以千七百戶

益封驃騎將軍減隴西北平上郡戍卒之半以寬天下

之繇居頃之乃分徙降者邊五郡故塞外

正義五郡謂隴西北地上

郡朔方雲中並是故塞外又在北海西南

而皆在河南因其故俗為屬國

正義

以降來之民分置五郡各依本國之俗而屬於漢故言屬國也

其明年匈奴入右北平

定襄殺略漢千餘人其明年天子與諸將議曰翕侯趙

信為單于畫計常以為漢兵不能度幕輕留

索隱索幕即沙幕古

字少耳輕留者謂匈奴以漢軍不能至故輕易留而不去也

今大發士卒其勢必得

所欲是歲元狩四年也元狩四年春上令大將軍青驃

騎將軍去病將各五萬騎步兵轉者踵軍數十萬

正義言轉

軍之士及步兵接後又數十萬人

而敢力戰深入之士皆屬驃騎驃騎

始為出定襄當單于捕虜言單于東乃更令驃騎出代

郡令大將軍出定襄郎中令為前將軍大僕為左將軍

主爵趙食其為右將軍平陽侯襄為後將軍皆屬大將

軍兵即度幕人馬凡五萬騎與驃騎等咸擊匈奴單于  
趙信為單于謀曰漢兵既度幕人馬罷匈奴可坐收虜  
耳乃悉遠北其輜重皆以精兵待幕北而適值大將軍  
軍出塞千餘里見單于兵陳而待於是大將軍令武剛  
車

集解駢案孫吳兵法曰有  
中有蓋謂之武剛車也

自環為營而縱五千騎往

當匈奴匈奴亦縱可萬騎會日且入大風起砂礫擊面  
兩軍不相見漢益縱左右翼繞單于單于視漢兵多而  
士馬尚彊戰而匈奴不利薄暮單于遂乘六羸壯騎可

數百直冒漢圍西北馳去時已昏漢匈奴相紛拏

正義三蒼

解詁云紛拏相牽也

殺傷大當

索隱以言所殺傷大略相當

漢軍左校捕虜言

單于未昏而去漢軍因發輕騎夜追之大將軍軍因隨

其後匈奴兵亦散走遲明

正義遲音值

行二百餘里

集解徐廣曰遲

一作黎索隱遲音值遲者待也待天欲明也漢書作會明諸本多作黎明鄒氏云黎遲也然黎黑也候天將明而猶黑也

不得單于頗捕斬首虜萬餘級遂至寘顏山趙信

城

集解徐廣曰寘音田

得匈奴積粟食軍軍留一日而還悉燒其

城餘粟以歸大將軍之與單于會也而前將軍廣右將

軍食其軍別從東道或失道後擊單于大將軍引還過  
幕南乃得前將軍右將軍大將軍欲使使歸報令長史  
簿責前將軍廣廣自殺右將軍至下吏贖為庶人大將  
軍軍入塞凡斬捕首虜萬九千級是時匈奴衆失單于  
十餘日右谷蠡王聞之自立為單于

索隱谷音祿蠡音黎又音離

單

于後得其衆右王乃去單于之號驃騎將軍亦將五萬  
騎車重與大將軍軍等而無裨將悉以李敢等為大校  
當裨將出代右北平千餘里直左方兵所斬捕功已多

大將軍軍既還天子曰驃騎將軍去病率師躬將所獲

葷粥之士

集解徐廣曰粥一作允駟案應劭曰所降士有材力者

約輕齎絕大幕

涉獲章渠

集解徐廣曰獲一作護索隱小顏云涉謂涉水也章渠單于之近臣謂涉水而破獲之漢

書云涉獲單于章渠也

以誅比車耆

集解晉灼曰王號也索隱比音必耳反

轉擊左

大將

索隱案漢書名雙也

斬獲旗鼓歷涉離侯

索隱漢書作度離侯小顏云山名歷

度濟弓閭

集解晉灼曰水名也索隱包愷弓音穹亦如字讀

獲屯頭王

集解駟案漢書

音義曰胡王號也

韓王等三人

集解徐廣曰王一作藉索隱李奇云皆匈奴王號

將軍

相國當戶都尉八十三人封狼居胥山禪於姑衍

正義積土

為壇於山上封以登臨翰海集解張晏曰登海邊山以祭天也祭地曰禪望海也索隱案崔浩云北

海名羣鳥之所解羽故云翰海廣志在沙漠北執鹵獲醜七萬有四百四十三

級師率減什三取食於敵遠行殊遠而糧不絕索隱連與卓同

卓遠以五千八百戶益封驃騎將軍右北平太守路博

德屬驃騎將軍會與城正義與音余不失期從至檮余山索隱

檮余音桃徒斬首捕虜二千七百級以千六百戶封博德為

符離侯北地都尉邢山集解徐廣曰一作衛山從驃騎將軍獲王

以千二百戶封山為義陽侯故歸義因淳王復陸支樓



專王伊即靺皆從驃騎將軍有功

索隱劉氏復音伏小顏音芳福反漢書專

作剌竝音專小顏音以之竟反靺音居言反

以千三百戶封復陸支為壯侯以

千八百戶封伊即靺為衆利侯從驃侯破奴昌武侯安

稽

集解徐廣曰姓趙故匈奴王

從驃騎有功益封各三百戶校尉敢

得旗鼓為關內侯食邑二百戶

索隱敢李廣子也

校尉自為爵

大庶長

索隱案徐自為也

軍吏卒為官賞賜甚多而大將軍不

得益封軍吏卒皆無封侯者兩軍之出塞塞間官及私

馬凡十四萬匹而復入塞者不滿三萬匹乃益置大司

馬位大將軍驃騎將軍皆為大司馬

集解如淳曰大將軍驃騎將軍皆有

大司馬之號也索隱案如淳云本無大司馬今新置耳案前謂太尉其官又省今武帝始置此位衛將軍霍驃

騎皆加此官

定令令驃騎將軍秩祿與大將軍等自是之後

大將軍青日退而驃騎日益貴舉大將軍故人門下多

去事驃騎輒得官爵唯任安不肯驃騎將軍為人少言

不泄

索隱案孔文祥云謂質重少言膽氣在中也周仁陰重不泄其行亦同也

有氣敢任

索隱

謂果敢任氣也

天子嘗欲教之孫吳兵法對曰顧方略何如耳

不至學古兵法天子為治第令驃騎視之對曰匈奴未

滅無以家為也由此上益重愛之然少而侍中貴不省士其從軍天子為遣太官齎數十乘既還重車餘棄梁肉而士有饑者其在塞外卒乏糧或不能自振而驃騎

尚穿域蹋鞠

集解徐廣曰穿地為營域索隱鞠戲以皮為之中實以毛楚蹋為戲也劉向別錄云

蹋鞠兵勢所以陳武事知有材也三蒼云鞠毛可蹋以毛為戲故云鞠戲鞠音巨六反正義按楚鞠書有域說篇即今之打毬也黃帝所作起戰國時程武士知其材力也若講武

事多此類大將軍為

人仁善退讓以和柔自媚於上然天下未有稱也驃騎將軍自四年軍後三年元狩六年而卒天子悼之發屬

國玄甲

正義屬國即上分置邊五郡者也玄甲鐵甲也

軍陳自長安至茂陵為

冢像祁連山

索隱案崔浩云去病破昆邪於此山故令為冢象之以旌功也姚氏案冢在茂陵東

北與衛青冢竝西者是青東者是去病冢上有豎石前有石馬相對又有石人也

諡之并武與

廣地曰景桓侯

集解蘇林曰景武諡也桓廣地諡也張晏曰諡法布義行剛曰景闕土服遠曰

桓索隱案景桓兩諡也布義行剛是武諡也辟土服遠是廣地之諡也以去病平生有武藝及廣邊地之功故云諡之并武與

廣地曰景桓也

子嬪代侯

索隱嬪音市戰反

嬪少字子侯上愛

之幸其壯而將之居六歲元封元年嬪卒諡哀侯無子

絕國除自驃騎將軍死後大將軍長子宜春侯伉坐法

失侯後五歲伉弟二人陰安侯不疑及發干侯登皆坐

酎金失侯失侯後二歲冠軍侯國除其後四年大將軍

青卒

集解徐廣曰元封五年

諡為烈侯子伉代為長平侯自大將

軍圍單于之後十四年而卒竟不復擊匈奴者以漢馬

少而方南誅兩越東伐朝鮮擊羌西南夷以故久不伐

胡大將軍以其得尚平陽公主

正義案漢書云平陽侯曹壽有惡疾就國乃詔

青尚平陽公主如淳云本陽信長公主為平陽侯所尚故稱平陽公主云

故長平侯伉代侯

六歲坐法失侯

左右兩大將軍及諸裨將名最

索隱謂凡計也

大將軍青凡七

出擊匈奴斬捕首虜五萬餘級一與單于戰收河南地

遂置朔方郡再益封凡萬一千八百戶封三子為侯侯

千三百戶并之萬五千七百戶其校尉裨將以從大將

軍侯者九人其裨將及校尉已為將者十四人

索隱案漢書云

為特將者十五人蓋通李廣也此李廣一人自有傳者

漢書則七人自有傳八人附見七人謂李廣張騫公孫賀李蔡曹襄

韓說蘇建也為裨將者曰李廣自有傳無傳者曰

將軍公孫賀賀義渠人

正義今慶州本義渠戎國也地理志云北義渠道也

其先

胡種賀父渾邪景帝時為平曲侯

集解徐廣曰為隴西太守

坐法失

侯賀武帝為太子時舍人武帝立八歲以太僕為輕車

將軍軍馬邑後四歲以輕車將軍出雲中後五歲以騎

將軍從大將軍有功封為南窳侯後一歲以左將軍再

從大將軍出定襄無功後四歲以坐酎金失侯後八歲

集解徐廣曰元鼎六年以浮沮將軍出五原

索隱沮音子餘反

二千餘里

無功後八歲

集解徐廣曰太初二年

以太僕為丞相封葛繹侯賀

七為將軍出擊匈奴無大功而再侯為丞相坐子敬聲

與陽石公主姁

集解徐廣曰陽石一云德邑

為巫蠱族滅無後

將軍李息郁郅人

集解服虔曰郅音室索隱小顏音質案北地縣名也正義之栗反今慶州

弘化縣是

事景帝至武帝立八歲為材官將軍軍馬邑後六

歲為將軍出代後三歲為將軍從大將軍出朔方皆無功凡三為將軍其後常為大行

將軍公孫敖義渠人以郎事武帝武帝立十二歲為驃騎將軍出代亡卒七千人當斬贖為庶人後五歲以校尉從大將軍有功封為合騎侯後一歲以中將軍從大



將軍再出定襄無功後二歲以將軍出北地後驃騎期

當斬贖為庶人後二歲以校尉從大將軍無功後十四

歲以因杆將軍築受降城

索隱杆音于

七歲復以因杆將軍

再出擊匈奴至余吾

索隱余音餘又音徐案水名在朔方

亡士卒多下吏

當斬詐死亡居民間五六歲後發覺復繫坐妻為巫蠱

族凡四為將軍出擊匈奴一侯

將軍李沮

索隱音沮豆之姐

雲中人

正義今嵐勝州也

事景帝武帝立

十七歲以左內史為彊弩將軍後一歲復為彊弩將軍

將軍李蔡成紀人也

正義秦州縣也

事孝文帝景帝武帝以輕

車將軍從大將軍有功封為樂安侯已為丞相坐法死  
將軍張次公河東人以校尉從衛將軍青有功封為岸  
頭侯其後太后崩為將軍軍北軍後一歲為將軍從大  
將軍再為將軍坐法失侯次公父隆輕車武射也以善  
射景帝幸近之也

將軍蘇建杜陵人以校尉從衛將軍青有功為平陵侯  
以將軍築朔方後四歲為游擊將軍從大將軍出朔方

後一歲以右將軍再從大將軍出定襄亡翕侯失軍當  
斬贖為庶人其後為代郡太守卒家在大猶鄉

將軍趙信以匈奴相國降為翕侯武帝立十七歲為前  
將軍與單于戰敗降匈奴

將軍張騫以使通大夏還為校尉從大將軍有功封為  
博望侯三歲為將軍出右北平失期當斬贖為庶人其  
後使通烏孫為大行而卒家在漢中

將軍趙食其殺裯人也

索隱縣名在馬翊殺音都活反  
又音丁外反裯音詡正義殺都

誨反雍州同官縣  
本漢役祠縣也

武帝立二十二歲以主爵為右將軍

從大將軍出定襄迷失道當斬贖為庶人

將軍曹襄以平陽侯為後將軍從大將軍出定襄襄曹參孫也

將軍韓說弓高侯庶孫也以校尉從大將軍有功為龍  
額侯坐酎金失侯元鼎六年以待詔為橫海將軍擊東  
越有功為按道侯以太初三年為游擊將軍屯於五原  
外列城為光祿勳掘蠱太子宮衛太子殺之

將軍郭昌雲中人也以校尉從大將軍元封四年以太  
中大夫為拔胡將軍屯朔方還擊昆明無功奪印

將軍荀彘太原廣武人以御見

正義以善御求見也

侍中為校尉

數從大將軍以元封三年為左將軍擊朝鮮無功以捕  
樓船將軍坐法死

最驃騎將軍去病凡六出擊匈奴其四出以將軍

集解徐廣

曰再出以剽姚校尉也

斬捕虜首十一萬餘級及渾邪王以衆降

數萬遂開河西酒泉之地

正義河謂隴右蘭州之西河也謂涼肅等州漢書西域傳

云驃騎將軍擊破匈奴右地置酒  
泉郡後分置武威張掖燉煌等郡

西方益少胡寇四益

封凡萬五千一百戶其校吏有功為侯者凡六人而後  
為將軍二人

將軍路博德平州人

正義漢書云西河平  
州按西河郡今汾州

以右北平太

守從驃騎將軍有功為符離侯驃騎死後博德以衛尉  
為伏波將軍伐破南越益封其後坐法失侯為彊弩都

尉屯居延卒

將軍趙破奴故九原人

正義今  
勝州

嘗亡入匈奴已而歸漢

為驃騎將軍司馬出北地時有功封為從驃侯坐酎金

失侯後一歲為匈奴將軍攻胡至匈奴水無功後二歲

集解徐廣曰元封二年

擊虜樓蘭王復封為浞野侯後六歲

集解徐廣

曰太初二年

為浚稽將軍將二萬騎擊匈奴左賢王左賢王

與戰兵八萬騎圍破奴破奴生為虜所得遂沒其軍居

匈奴中十歲復與其太子安國亡入漢

集解徐廣曰以太初二年入匈奴

奴天漢元年亡歸涉四年

後坐巫蠱族

自衛氏興大將軍青首封其後枝屬為五侯凡二十四

歲而五侯盡奪衛氏無為侯者

太史公曰蘇建語余曰吾嘗責大將軍至尊重而天下

之賢大夫毋稱焉

索隱謂不為賢士大夫所稱譽

願將軍觀古名將所

招選擇賢者勉之哉大將軍謝曰自魏其武安之厚賓

客天子常切齒彼親附士大夫招賢絀不肖者人主之

柄也人臣奉法遵職而已何與招士

索隱與音預

驃騎亦放

此意其為將如此

索隱述贊曰君子豹變貴賤何常青本奴虜忽總戎行姊配皇極身尚平陽寵榮斯偕取亂彝章剽姚繼



踵再靜  
邊方

史記卷一百十一

史記卷一百一十一考證

衛將軍驃騎列傳人奴之生得無笞罵即足矣。

臣照

按費袞曰人奴之為一句生得無笞罵即足矣為一句生讀如生乃與噲等為伍之生其說亦可通

以千一百戶封建為平陵侯。漢表作一千戶

斬輕銳之卒捕服聽者三千七十一級。漢書作三千

一十七級

益封青三千戶。漢書作三千八百戶

以千三百戶封戎奴為從平侯。○漢表從平一千一百戶

議郎周霸等索隱案郊祀志議封禪有周霸故知儒生也。○周霸議封禪見封禪書又儒林傳云魯周霸至膠西內史申公弟子也

誅全甲。○凌稚隆曰按漢書霍去病合短兵鏖皋蘭下殺折蘭王斬盧胡王銳悍者誅全甲獲醜執渾邪王子師古注全甲謂軍中之甲不喪失也今史記於短

兵下无麇臯蘭下一句於斬盧胡王下却言誅全甲殊不可解盖傳寫之誤也徐廣注曰全一作金因其誤而注之耳

師大率減什三索隱案漢書作減什七小顏云破匈奴之師十減其七一云漢兵亡失之數下皆類此案一說為是也○茅瓚曰若如一說則是方叙驃騎之功而又計其損失之數也當依小顏所云

校尉僕多有功索隱案漢表作僕朋疑多是誤○

臣照

按僕朋祇一見於漢表耳史漢驃騎傳及建元以來  
侯者年表皆作僕多三人占從二人之言則是僕朋  
為誤非僕多誤也

常與壯騎先其大將軍軍亦有天幸未嘗困絕也○按  
董份曰嘗與壯騎先其大將軍為句軍亦有天幸承  
上文皆言驃騎也王右丞詩衛青不敗由天幸則是  
以大將軍別起為句矣不知太史公此傳專右大將  
軍而貶驃騎謂驃騎受上寵又有天幸所以不困絕

而成功也右丞尚誤況其他乎史記誠不易讀也

仍與之勞○凌稚隆曰按仍與漢書作仍興注重興軍  
旅之勞也

連行殊遠○

臣照

按連漢書作卓隸辨曰祝睦後碑懿

德連優按卓古通連楚辭哀時命處卓卓而日遠兮

卓一作連

元封元年嬪卒○封禪書奉車子侯暴病一日死

武帝立十二歲為驃騎將軍○

臣照

按驃騎將軍武帝

特立此名以寵去病者本傳元光五年公孫敖為騎將軍此驃字蓋衍

家在漢中○程一枝曰蘇建家在大猶鄉張騫家在漢中二家字一本作冢

遂開河西酒泉之地正義河謂隴右蘭州之西河也謂

涼肅等州○

臣照

按正義謂涼肅等州句謂字上疑

脫酒泉二字

史記卷一百一十一考證

欽定四庫全書

史記卷一百十二

漢 太 史 令司馬遷 撰

宋中郎外兵曹參軍裴駰集解

唐國子博士弘文館學士司馬貞索隱

唐諸王侍讀率府長史張守節正義

平津侯主父列傳第五十二

丞相公孫弘者齊菑川國薛縣人也

索隱案薛縣本屬魯漢置菑川國後



割入齊也正義表云菑川國文帝分齊置都劇括地志云故劇城在青州壽光縣南三十一里故薛城在徐州滕縣界地理志云薛縣屬魯國按薛與劇隔兗州及太山未詳公孫弘墓又在青州北魯縣西二十里也

字

季少時為薛獄吏有臯免家貧牧豕海上年四十餘乃學春秋雜說養後母孝謹建元元年天子初即位招賢良文學之士是時弘年六十徵以賢良為博士使匈奴還報不合上意上怒以為不能弘廼病免歸元光五年有詔徵文學菑川國復推上公孫弘弘讓謝國人曰臣已嘗西應命以不能罷歸願更推選國人固推弘弘至

太常太常令所徵儒士各對策百餘人弘第居下策奏  
天子擢弘對為第一召入見狀貌甚麗拜為博士是時  
通西南夷道置郡巴蜀民苦之詔使弘視之還奏事盛  
毀西南夷無所用上不聽弘為人恢竒多聞常稱以為  
人主病不廣大人臣病不儉節弘為布被食不重肉後  
母死服喪三年每朝會議開陳其端令人主自擇不肯  
面折庭爭於是天子察其行敦厚辯論有餘習文法吏  
事而又緣飾以儒術上大說之

索隱謂以儒術飾文法  
如衣服之有領緣以為

飾

二歲中

集解徐廣曰  
一云一歲

至左內史弘奏事有不可不庭

辯之嘗與主爵都尉汲黯請間汲黯先發之弘推其後  
天子常說所言皆聽以此日益親貴常與公卿約議至  
上前皆倍其約以順上旨汲黯庭詰弘曰齊人多詐而  
無情實始與臣等建此議今皆倍之不忠上問弘弘謝  
曰夫知臣者以臣為忠不知臣者以臣為不忠上然弘  
言左右幸臣每毀弘上益厚遇之元朔三年張敖免以  
弘為御史大夫是時通西南夷東置滄海北築朔方之

郡弘數諫以為罷敞中國以奉無用之地願罷之於是

天子乃使朱買臣等難弘置朔方之便發十策弘不得

一集解韋昭曰以弘之才非不能得一也以爲不可不一敢逆上耳正義顏師古曰言其利害十條弘無以應

弘迺謝曰山東鄙人不知其便若是願罷西南夷滄海

而專奉朔方上乃許之汲黯曰弘位在三公奉祿甚多

然為布被此詐也上問弘弘謝曰有之夫九卿與臣善

者無過黯然今日庭詰弘誠中弘之病夫以三公為布

被誠飾詐欲以釣名且臣聞管仲相齊有三歸侈擬於

君桓公以霸亦上僭於君晏嬰相景公食不重肉妾不

衣絲齊國亦治此下比於民

索隱比音鼻比者近也小顏音比方之比

今臣

弘位為御史大夫而為布被自九卿以下至於小吏無

差誠如汲黯言且無汲黯忠陛下安得聞此言天子以

為謙讓愈益厚之卒以弘為丞相封平津侯

集解徐廣曰大臣表

曰元朔五年十一月乙丑公孫弘為丞相功臣表曰元朔三年十一月乙丑封平津侯駟案漢書高成之平津

鄉也索隱案漢書曰漢興皆以列侯為丞相弘本無爵乃詔封弘高成之平津鄉六百五十戶為平津侯丞相

封侯自弘始也

弘為人意思外寬內深

索隱謂弘外寬內深意多有忌害也

諸嘗

與弘有郤者雖詳與善陰報其禍殺主父偃徙董仲舒

於膠西皆弘之力也食一肉脫粟之飯

索隱案一肉言不兼味也脫粟

纔脫穀而已言不精鑿也

故人所善賓客仰衣食弘奉祿皆以給之

家無所餘士亦以此賢之淮南衡山謀反治黨與方急

弘病甚自以為無功而封位至丞相宜佐明主填撫國

家使人由臣子之道今諸侯有畔逆之計此皆宰相奉

職不稱恐竊病死無以塞責

索隱案人臣委質於君死生由君臣若一朝病死是

竊死也

乃上書曰臣聞天下之通道五所以行之者三

索隱

案此語出子思子  
今見禮中庸篇

曰君臣父子兄弟夫婦長幼之序此

五者天下之通道也智仁勇此三者天下之通德所以  
行之者也故曰力行近乎仁好問近乎智知恥近乎勇  
知此三者則知所以自治知所以自治然後知所以治  
人天下未有不能自治而能治人者也此百世不易之  
道也今陛下躬行大孝鑒三王建周道兼文武厲賢予  
祿集解徐廣曰  
厲一作廣也量能授官今臣弘罷駑之質無汗馬之  
勞陛下過意擢臣弘卒伍之中封為列侯致位三公臣

弘行能不足以稱素有負薪之疾恐先狗馬填溝壑終無以報德塞責願歸侯印乞骸骨避賢者路天子報曰

古者賞有功褒有德守成尚文遭遇右武

索隱小顏云右亦上也言

遭遇亂時則上武也

未有易此者也朕宿昔庶幾獲承尊位懼不

能寧惟所與共為治者君宜知之蓋君子善善惡惡君

宜知之君若謹行常在朕躬君不幸罹霜露之病何恙

不已

集解駟案漢書音義曰何恙喻小疾不以時愈索隱恙憂也以言罹霜露寒涼之疾輕何憂於病不

止禮曰疾止復初也

迺上書歸侯乞骸骨是章朕之不德也今事



少間君其省思慮一精神輔以醫藥因賜告牛酒雜帛

居數月病有瘳視事元狩二年弘病竟以丞相終

集解  
駟案

漢書曰年八十索隱案弘凡  
為御史丞相六歲年八十終

子度嗣為平津侯度為山

陽太守十餘歲坐法失侯

索隱漢書云坐不遣鉅野令  
史成詣公車論為城旦元始

中詔復弘後  
為關內侯也

主父偃者齊臨菑人也學長短縱橫之術晚乃學易春  
秋百家言游齊諸生間莫能厚遇也齊諸儒生相與排  
擯不容於齊家貧假貸無所得廼北游燕趙中山皆莫

能厚遇為客甚困孝武元光年中以為諸侯莫足游者乃西入關見衛將軍衛將軍數言上上不召資用乏留久諸公賓客多厭之乃上書闕下朝奏暮召入見所言九事其八事為律令一事諫伐匈奴其辭曰臣聞明主不惡切諫以博觀忠臣不敢避重誅以直諫是故事無遺策而功流萬世今臣不敢隱忠避死以效愚計願陛下幸赦而少察之司馬法曰國雖大好戰必亡天下雖平忘戰必危天下既平天子大凱

集解應劭曰大凱周禮還師振旅之

春蒐秋獮諸侯春振旅秋治兵所以不忘戰也

集解宋均

曰春秋少陽少陰氣弱未全須人功而後用士庶法之教而後成宗仁本義天子諸侯必春秋講武簡閱車徒以順時氣且夫怒者逆德也兵者凶器也爭者末節也

古之人君一怒必伏尸流血故聖王重行之夫務戰勝窮武事者未有不悔者也昔秦皇帝任戰勝之威蠶食天下并吞戰國海內為一功齊三代務勝不休欲攻匈奴李斯諫曰不可夫匈奴無城郭之居委積之守遷徙鳥舉難得而制也輕兵深入糧食必絕踵糧以行重不

及事得其地不足以為利也遇其民不可役而守也勝

必殺之非民父母也靡敝中國快心匈奴非長策也

索隱

靡音縻敝猶凋敝也

秦皇帝不聽遂使蒙恬將兵攻胡辟地千里

以河為境地固澤

集解徐廣曰一作斥

鹹鹵

集解瓚曰其地多水澤又有鹵

不生

五穀然後發天下丁男以守北河暴兵露師十有餘年

死者不可勝數終不能踰河而北是豈人衆不足兵革

不備哉其勢不可也又使天下蜚芻輓粟

集解文穎曰轉芻穀就戰

是起於東睡

集解徐廣曰睡在東萊音縋索隱睡音逐瑞反注音縋其音同也

琅邪負

海之郡轉輸北河率三十鍾而致一石男子疾耕不足  
於糧饟女子紡績不足於帷幕百姓靡敝孤寡老弱不  
能相養道路死者相望蓋天下始畔秦也及至高皇帝  
定天下略地於邊聞匈奴聚於代谷之外而欲擊之御  
史成進諫曰不可夫匈奴之性獸聚而鳥散從之如搏  
影今以陛下盛德攻匈奴臣竊危之高帝不聽遂北至  
於代谷果有平城之圍高皇帝蓋悔之甚乃使劉敬往  
結和親之約然後天下忘干戈之事故兵法曰興師十

萬日費千金夫秦常積衆暴兵數十萬人雖有覆軍殺將係虜單于之功亦適足以結怨深讎不足以償天下之費夫上虛府庫下敝百姓甘心於外國非完事也夫匈奴難得而制非一世也行盜侵驅所以為業也天性固然上及虞夏殷周固弗程督禽獸畜之不屬為人夫上不觀虞夏殷周之統而下脩近世之失此臣之所大憂百姓之所疾苦也且夫兵久則變生事苦則慮易乃使邊境之民靡敝愁苦而有離心將吏相疑而外市

集解

張晏曰與外國交求利已若章邯之比

故尉佗章邯得以成其私也夫秦

政之所以不行者權分乎二子此得失之效也故周書

曰安危在出令存亡在所用願陛下詳察之少加意而

熟慮焉是時趙人徐樂齊人嚴安俱上書言世務各一

事

索隱樂音岳嚴本姓莊明帝諱後並改姓嚴也安及徐樂並拜郎中樂後為中大夫

徐樂曰臣

聞天下之患在於土崩不在於瓦解古今一也何謂土

崩秦之末世是也陳涉無千乘之尊尺土之地身非王

公大人名族之後無鄉曲之譽非有孔墨曾子之賢陶

朱猗頓之富也然起窮巷奮棘矜

集解駟案  
矜音勤

偏袒大呼

而天下從風此其故何也由民困而主不恤下怨而上不知也俗已亂而政不脩此三者陳涉之所以為資也是之謂土崩故曰天下之患在於土崩何謂瓦解吳楚齊趙之兵是也七國謀為大逆號皆稱萬乘之君帶甲數十萬威足以嚴其境內財足以勸其士民然不能西攘尺寸之地而身為禽於中原者此其故何也非權輕於匹夫而兵弱於陳涉也當是之時先帝之德澤未衰



而安土樂俗之民衆故諸侯無境外之助此之謂瓦解  
故曰天下之患不在瓦解由是觀之天下誠有土崩之  
勢雖布衣窮處之士或首惡而危海內陳涉是也況三  
晉之君或存乎天下雖未有大治也誠能無土崩之勢  
雖有彊國勁兵不得旋踵而身為禽矣吳楚齊趙是也  
況羣臣百姓能為亂乎哉此二體者安危之明要也賢  
主所留意而深察也間者關東五穀不登年歲未復民  
多窮困重之以邊境之事推數循理而觀之則民且有

不安其處者矣不安故易動易動者土崩之勢也故賢  
主獨觀萬化之原明於安危之機脩之廟堂之上而銷  
未形之患其要期使天下無土崩之勢而已矣故雖有  
彊國勁兵陛下逐走獸射蜚鳥弘游燕之囿淫縱恣之  
觀極馳騁之樂自若也金石絲竹之聲不絕於耳帷帳  
之私俳優侏儒之笑不乏於前而天下無宿憂名何必  
湯武俗何必成康雖然臣竊以為陛下天然之聖寬仁  
之資而誠以天下為務則湯武之名不難侔而成康之

俗可復興也此二體者立然後處尊安之實揚名廣譽  
於當世親天下而服四夷餘恩遺德為數世隆南面負  
宸攝袂而揖王公此陛下之所服也臣聞圖王不成其  
敝足以安安則陛下何求而不得何為而不成何征而  
不服乎哉嚴安上書曰臣聞周有天下其治三百餘歲  
成康其隆也刑錯四十餘年而不用及其衰也亦三百  
餘歲故五伯更起五伯者常佐天子興利除害誅暴禁  
邪匡正海內以尊天子五伯既沒賢聖莫續天子孤弱

號令不行諸侯恣行疆陵弱衆暴寡田常篡齊六卿分

晉並為戰國此民之始苦也於是疆國務攻弱國備守

合從連橫馳車擊轂介冑生蠆蝨民無所告愬及至秦

王蠶食天下并吞戰國稱號曰皇帝一海內之政壞諸

侯之城銷其兵鑄以為鍾虡

索隱虡音巨鄒氏本作鑿音同

示不復用

元元黎民得免於戰國逢明天子人人自以為更生嚮

使秦緩其刑罰薄賦歛省繇役貴仁義賤權利上篤厚

下智巧

索隱上猶尚也貴也下謂以智巧為下也

變風易俗化於海內則世

世必安矣秦不行是風而脩其故俗為智巧權利者進  
篤厚忠信者退法嚴政峻諂諛者衆日聞其美意廣心  
軼欲肆威海外乃使蒙恬將兵以北攻胡辟地進境戍

於北河蜚芻輓粟以隨其後又使尉佗屠睢

索隱案尉官也佗趙

佗也音徒何反屠睢人姓名睢音雖

將樓船之士南攻百越使監祿

集解韋昭

曰監御史名祿也

鑿渠運糧深入越越人遁逃曠日持久糧食

絕乏越人擊之秦兵大敗秦乃使尉佗將卒以戍越當  
是時秦禍北構於胡南挂於越宿兵無用之地進而不

得退行十餘年丁男被甲丁女轉輸苦不聊生自經於

道樹死者相望及秦皇帝崩天下大叛陳勝吳廣舉陳

索隱謂勝廣舉兵據陳舉音如字或音據恐疎也下同

武臣張耳舉趙項梁舉吳

田儋舉齊景駒舉郢周市舉魏韓廣舉燕窮山通谷豪

士並起不可勝載也然皆非公侯之後非長官之吏也

無尺寸之勢起閭巷棘矜應時而皆動不謀而俱起

不約而同會壤長地進

集解張晏曰壤地進益也

至於霸王時教使

然也秦貴為天子富有天下滅世絕祀者窮兵之禍也

故周失之弱秦失之彊不變之患也今欲招南夷朝夜

郎降羌棘略瀛州

集解如淳曰東夷也索隱棘音白北反又皮逼反瀛州地名即古瀛陌國

也音紆廢反

建城邑深入匈奴燔其龍城

索隱匈奴城名音龍燔音煩燔燒也

議者美之此人臣之利也非天下之長策也今中國無  
狗吠之驚而外累於遠方之備靡敝國家非所以子民  
也行無窮之欲甘心快意結怨於匈奴非所以安邊也  
禍結而不解兵休而復起近者愁苦遠者驚駭非所以  
持久也今天下鍛甲砥劍橋箭累弦轉輸運糧未見休

時此天下之所共憂也夫兵久而變起事煩而慮生今

外郡之地或幾千里列城數十形束壤制

集解服虔曰言所束在郡

守土壤足以專民制蘇林曰言其土地形勢足以束制其民也索隱案謂地形及土壤皆束制在諸侯也旁

脅諸侯非公室之利也上觀齊晉之所以亡者公室卑

削六卿大盛也下觀秦之所以滅者嚴法刻深欲大無

窮也今郡守之權非特六卿之重也地幾千里非特閭

巷之資也甲兵器械非特棘矜之用也以遭萬世之變

則不可稱諱也書奏天子天子召見三人謂曰公等皆



安在何相見之晚也

集解徐廣曰佗史記本皆不見嚴安此旁所纂者皆取漢書耳然漢

書不宜乃容大異或寫史記相承闕脫也索隱纂音撰

於是上乃拜主父偃徐樂

嚴安為郎中數見上疏言事詔拜偃為謁者遷樂為中

大夫一歲中四遷偃偃說上曰古者諸侯不過百里疆

弱之形易制今諸侯或連城數十地方千里緩則驕奢

易為淫亂急則阻其疆而合從以逆京師今以法割削

之則逆節萌起前日鼂錯是也今諸侯子弟或十數而

適嗣代立餘雖骨肉無尺寸地封則仁孝之道不宣願

陛下令諸侯得推恩分子弟以地侯之彼人人喜得所願上以德施實分其國不削而稍弱矣於是上從其計

集解徐廣曰元朔二年始令諸侯王分封子弟也

又說上曰茂陵初立天下豪

傑并兼之家亂衆之民皆可徙茂陵內實京師外銷姦猾此所謂不誅而害除上又從其計尊立衛皇后及發燕王定國陰事偃有功焉大臣皆畏其口賂遺累千金人或說偃曰太橫矣主父曰臣結髮游學四十餘年身不得遂親不以為子昆弟不收賓客棄我我阨日久矣

且丈夫生不五鼎食死即五鼎烹耳吾日暮途遠故倒

行暴施之

索隱按偃言吾日暮塗遠恐赴前塗不跌故須倒行而逆施乃可及耳今此本作暴暴者

言已困久得申當須急暴行事以快意也暴者卒也急也

偃盛言朔方地肥饒外阻

河蒙恬城之以逐匈奴內省轉輸戍漕廣中國滅胡之

本也上覽其說下公卿議皆言不便公孫弘曰秦時常

發三十萬衆築北河終不可就已而棄之主父偃盛言

其便上竟用主父計立朔方郡元朔二年主父言齊王

內淫佚行僻上拜主父為齊相至齊遍召昆弟賓客散

五百金予之數之曰始吾貧時昆弟不我衣食賓客不  
我內門今吾相齊諸君迎我或千里吾與諸君絕矣毋  
復入偃之門乃使人以王與姊奸事動王王以為終不  
得脫罪恐效燕王論死乃自殺有司以聞主父始為布  
衣時嘗游燕趙及其貴發燕事趙王恐其為國患欲上  
書言其陰事為偃居中不敢發及為齊相出關即使人  
上書告言主父偃受諸侯金以故諸侯子弟多以得封  
者及齊王自殺上聞大怒以為主父劫其王令自殺乃

徵下吏治主父服受諸侯金寶不劫王令自殺上欲勿  
誅是時公孫弘為御史大夫乃言曰齊王自殺無後國  
除為郡入漢主父偃本首惡陛下不誅主父偃無以謝  
天下乃遂族主父偃主父偃方貴幸時賓客以千數及  
其族死無一人收者唯獨汶孔車集解徐廣曰孔車汶人也沛有汶縣索隱  
汶戶交反收葬之天子後聞之以為孔車長者也  
車尺奢反

太史公曰公孫弘行義雖修然亦遇時漢興八十餘年

矣

集解徐廣曰漢初至元朔二年八十年也

上方鄉文學招俊人以廣儒墨

弘為舉首主父偃當路諸公皆譽之及名敗身誅士爭  
言其惡悲夫

太皇太后詔大司徒大司空

集解徐廣曰此詔是平  
帝元始中王元后詔後

人寫此及班固所稱以續卷後索隱  
案廣所云則又非褚先生所錄也

蓋聞治國之道

富民為始富民之要在於節儉孝經曰安上治民莫

善於禮禮與奢也寧儉昔者管仲相齊桓霸諸侯有

九合一匡之功而仲尼謂之不知禮以其奢侈擬

於君故也夏禹卑宮室惡衣服後聖不循由此言之

始之盛也德優矣莫高於儉儉化俗民則尊卑之序得而骨肉之恩親爭訟之原息斯乃家給人足刑錯之本也歟可不務哉夫三公者百寮之率萬民之表也未有樹直表而得曲影者也孔子不云乎子率以正孰敢不正舉善而教不能則勸維漢興以來股肱宰臣身行儉約輕財重義較然著明索隱較音角較明也未有若故丞相平津侯公孫弘者也位在丞相而為布被脫粟之飯不過一肉故人所善賓客皆分奉祿以給

之無有所餘誠內自克約而外從制汲黯詰之乃聞

于朝此可謂減於制度

集解應劭曰禮貴有常尊衣服有常品

而可施

行者也德優則行否則止與內奢泰而外為詭服以

釣虛譽者殊科以病乞骸骨孝武皇帝即制曰賞有

功褒有德善善惡惡君宜知之其省思慮存精神輔

以醫藥賜告治病牛酒雜帛居數月有瘳視事至元

狩二年竟以善終于相位夫知臣莫若君此其效也

弘子度嗣爵後為山陽太守坐法失侯夫表德章義



所以率俗厲化聖王之制不易之道也其賜弘後子  
孫之次當為後者爵闕內侯食邑三百戶徵詣公車  
上名尚書朕親臨拜焉

班固稱曰公孫弘卜式兒寬皆以鴻漸之翼困於燕

雀

集解李奇曰漸進也鴻一舉而進千里者羽翼之材也弘等皆以大材初為俗所薄若燕雀不知鴻

鵠之志也索隱案謂公孫等未遇為時所輕若飛鴻之未漸受困於燕雀也遠迹羊豕之

間

集解韋昭曰遠跡謂耕牧在於遠方索隱案公孫牧豕卜式牧羊也非遇其時焉能

致此位乎是時漢興六十餘載海內乂安

索隱乂理也

府

庫充實而四夷未賓制度多闕上方欲用文武求之

如弗及始以蒲輪迎枚生

索隱案謂枚乘也漢始詔申公亦以蒲輪謂以蒲裹

車輪恐傷草木也且蒲是草之美者

故禮有蒲璧蓋或畫績以為榮飾也

見主父而歎息

索隱案上文嚴安等上書上曰

公等安在何相見之晚者是也

羣臣慕嚮異人並出

卜式試於芻牧弘羊擢於賈豎衛青奮於奴僕日碑

出於降虜斯亦曩時版築飯牛之朋矣漢之得人於

茲為盛儒雅則公孫弘董仲舒兒寬篤行則石建石

慶質直則汲黯卜式推賢則韓安國鄭當時定令則

趙禹張湯文章則司馬遷相如滑稽則東方朔枚臯  
應對則嚴助朱買臣歷數則唐都落下閎協律則李  
延年運籌則桑弘羊奉使則張騫蘇武將帥則衛青  
霍去病受遺則霍光金日磾其餘不可勝紀是以興  
造功業制度遺文後世莫及孝宣承統纂修洪業亦  
講論六藝招選茂異而蕭望之梁丘賀夏侯勝韋玄  
成嚴彭祖尹更始以儒術進劉向王褒以文章顯將  
相則張安世趙充國魏相邴吉于定國杜延年治民

則黃霸王成龔遂鄭弘邵信臣韓延壽尹翁歸趙廣漢之屬皆有功迹見述於後累其名臣亦其次也

索隱述贊曰平津巨儒晚年始遇外示寬儉內懷嫉妬寵備榮爵身受肺腑主父推恩觀時設度生食五鼎死非時蠹

史記卷一百十二

史記卷一百一十二考證

平津侯主父列傳二歲中至左內史集解徐廣曰一云  
一歲○臣浩按一歲中為是弘以五年對策即於是  
年為左內史見漢書百官公卿表

是時趙人徐樂齊人嚴安俱上書言世務各一事索隱  
嚴本姓莊漢明帝諱後並改姓嚴也○顧炎武曰鄧  
伯羔謂安自姓嚴然漢書藝文志曰主父偃二十八  
篇徐樂一篇莊安一篇是安本姓莊非嚴也漢書之

稱莊安班氏所未改也史記之稱嚴安後人所追改也

又使尉佗屠睢將樓船之士南攻百越○臣照按淮南

子人間訓曰秦皇利越之犀角象齒翡翠珠璣乃使尉屠睢發卒五十萬為五軍則此佗字疑衍

弘為舉首○王若虛辨惑曰舉首下意似不足豈有關文乎

後聖不循○董份曰後聖聖字恐當是世字言禹聖德

後世不能循也

始之盛也○凌稚隆曰一本始作治

始以蒲輪迎枚生索隱謂以蒲裹車輪恐傷草木也○  
徐孚遠曰封泰山用蒲輪恐傷草木也迎賢人用蒲  
輪欲令車安也索隱非是



史記卷一百一十二考證

欽定四庫全書

史記卷一百十三

漢

太

史

令司馬遷撰

宋中郎外兵曹參軍裴駙集解

唐國子博士弘文館學士司馬貞索隱

唐諸王侍讀率府長史張守節正義

南越尉佗列傳第五十三

南越王

正義都廣州南海縣

尉佗者真定人也

索隱尉官也佗名也姓趙佗音徒河

反又十三州記云大都曰守小郡曰尉韋昭云真定故郡名後更為縣在常山也姓趙氏秦時

已并天下略定楊越集解張晏曰楊州之南越也索隱案戰國策云吳起為楚收楊越正

義夏禹九州本屬楊州故云楊越置桂林南海象郡索隱地理志武帝更名桂林曰鬱林

秦本紀始皇三十三年略陸梁地以為南海桂林象郡地理志云武帝更名曰南以謫徙民隱

謫音陟與越雜處十三歲集解徐廣曰秦并天下至二世元年十三年并天下八歲

乃平越地至二世佗秦時用為南海龍川令索隱地理志云龍川屬南

海也正義顏師古云龍川南海縣也即今之循州也裴氏廣州記云本博羅縣之東鄉有龍穿地而出即穴流

泉因以至二世時南海尉任囂病且死集解徐廣曰爾時未言都

尉也索隱音五刀反

召龍川令趙佗語曰聞陳勝等作亂秦為

無道天下苦之項羽劉季陳勝吳廣等州郡各共興軍

聚衆虎爭天下中國擾亂未知所安豪傑畔秦相立南

海僻遠吾恐盜兵侵地至此吾欲興兵絕新道索隱案蘇林云

秦所通越道自脩待諸侯變會病甚且番禺負山險阻南海

東西數千里頗有中國人相輔此亦一州之主也可以

立國郡中長吏無足與言者故召公告之即被佗書集解

韋昭曰被之以書音光被之被索隱被音皮義反行南海尉事索隱服虔云罷詐詔書使為南

海尉噐死佗即移檄告橫浦陽山湟谿關曰

集解徐廣曰在桂陽通四

會也索隱案南康記云南野大庾嶺三十里至橫浦有秦時關其下謂為塞上姚氏案地理志云桂陽有陽山

縣今此縣上流百餘里有騎田嶺當是陽山關鄒氏劉氏本湟並作湟音年結反漢書作湟谿音皇又衛青傳

云出桂陽下湟水是而姚察云史記作滙今本有湟湟及滙不同盖由隨見輒改故也水經云含滙縣南有滙

浦關未知孰是然鄒誕作湟漢書作湟盖近於古

盜兵且至急絕道聚兵自守

因稍以法誅秦所置長吏以其黨為假守

索隱案謂佗立其所黨為

郡縣之職或假守也

秦已破滅佗即擊并桂林象郡自立為南越

武王

集解韋昭曰生以武為號不稽於古也

高帝已定天下為中國勞苦

故釋佗弗誅漢十一年遣陸賈因立佗為南越王與剖  
符通使和集百越毋為南邊患害與長沙接境高后時  
有司請禁南越關市鐵器佗曰高帝立我通使物今高  
后聽讒臣別異蠻夷隔絕器物此必長沙王計也欲倚  
中國擊滅南越而并王之自為功也於是佗乃自尊號  
為南越武帝發兵攻長沙邊邑敗數縣而去焉高后遣  
將軍隆慮侯竈往擊之

索隱韋昭云竈姓周隆慮縣名屬河內音林間

會暑溼

士卒大疫兵不能踰嶺

索隱案即陽山嶺也

歲餘高后崩即罷兵

佗因此以兵威邊財物賂遺閩越西甌駱役屬焉

集解駢案

漢書音義曰駱越也索隱姚氏案廣州記云交趾有駱田仰潮水上下人食其田名為駱侯諸縣自名為駱將銅印青綬即今之令後蜀王子將兵討駱侯自稱為安陽王治封谿縣後南越王尉佗攻破安陽王令二使典主交趾九真二郡即甌駱也東西萬餘里廼乘黃屋左纛稱制與中

國侔及孝文帝元年初鎮撫天下使告諸侯四夷從代來即位意喻盛德焉乃為佗親冢在真定置守邑歲時奉祀召其從昆弟尊官厚賜寵之詔丞相陳平等舉可使南越者平言好時陸賈先帝時習使南越廼召賈以

為太中大夫往使因讓佗自立為帝曾無一介之使報者陸賈至南越王甚恐為書謝稱曰蠻夷大長老夫臣佗前日高后隔異南越竊疑長沙王讒臣又遙聞高后盡誅佗宗族掘燒先人家以故自棄犯長沙邊境且南方卑溼蠻夷中間其東閩越千人衆號稱王其西甌駱裸國亦稱王

索隱裸音和寡反裸露形也

老臣妄竊帝號聊以自娛

豈敢以聞天王哉乃頓首謝願長為藩臣奉貢職於是乃下令國中曰吾聞兩雄不俱立兩賢不並世皇帝賢



天子也自今以後去帝制黃屋左纛陸賈還報孝文帝

大說遂至孝景時稱臣使人朝請然南越其居國竊如

故號名其使天子稱王朝命如諸侯至建元四年卒佗

孫胡為南越王

集解徐廣曰皇甫謐曰越王趙佗以建元四年卒爾時漢興七十年佗蓋百歲

矣此時閩越王郢興兵擊南越邊邑胡使人上書曰兩

越俱為藩臣毋得擅興兵相攻擊今閩越興兵侵臣臣

不敢興兵唯天子詔之於是天子多南越義守職約為

興師遣兩將軍往討閩越

索隱王恢韓安國

兵未踰嶺閩越王

弟餘善殺郢以降於是罷兵天子使莊助往諭意南越  
王胡頓首曰天子乃為臣興兵討閩越死無以報德遣  
太子嬰齊入宿衛謂助曰國新被寇使者行矣胡方日  
夜裝入見天子助去後其大臣諫胡曰漢興兵誅郢亦  
行以驚動南越且先王昔言事天子期無失禮要之不  
可以說好語入見索隱漢書悅作怵  
韋昭云誘怵好語入見則不得復歸  
亡國之勢也於是胡稱病竟不入見後十餘歲胡實病  
甚太子嬰齊請歸胡薨諡為文王嬰齊代立即藏其先

武帝璽

索隱李邵云藏其僭號之璽也

嬰齊其入宿衛在長安時取邯

鄲繆氏女生子興

集解徐廣曰一作曲索隱繆音紀虬反繆姓出邯鄲

及即位上

書請立繆氏女為后興為嗣漢數使使者風諭嬰齊嬰

齊尚樂擅殺生自恣懼入見要用漢法比內諸侯固稱

病遂不入見遣子次公入宿衛嬰齊薨謚為明王太子

興代立其母為太后太后自未為嬰齊姬時常與霸陵

人安國少季通

索隱安國姓也少季名也

及嬰齊薨後元鼎四年漢

使安國少季往諭王王太后以入朝比內諸侯令辯士

諫大夫終軍等宣其辭勇士魏臣等輔其缺

集解徐廣曰一作決

衛尉路博德將兵屯桂陽待使者王年少太后中國人也嘗與安國少季通其使復私焉國人頗知之多不附太后太后恐亂起亦欲倚漢威數勸王及羣臣求內屬即因使者上書請比內諸侯三歲一朝除邊關於是天子許之賜其丞相呂嘉銀印及內史中尉太傅印餘得自置除其故黥劓刑用漢法比內諸侯使者皆留填撫之王王太后飭治行裝重齋為入朝具其相呂嘉年長

矣相三王宗族官仕為長吏者七十餘人男盡尚王女

女盡嫁王子兄弟宗室及蒼梧秦王有連

集解 駟案漢書音義曰蒼

梧越中王自名為秦王連親婚也索隱案蒼梧秦王即下趙光是也有連者連姻也趙與秦同姓故稱秦王

其居國中甚重越人信之多為耳目者得衆心愈於王

王之上書數諫止王王弗聽有畔心數稱病不見漢使

者使者皆注意嘉勢未能誅王王太后亦恐嘉等先事

發乃置酒介漢使者權

集解 韋昭曰恃使者為介冑也索隱志林云介者因也欲因使

者權誅呂嘉也韋昭以介為恃介者間也以言間恃漢使之權意即得矣然云恃為介冑則非也虞喜以介為

因亦有所由案介者賓主所由也

謀誅嘉等使者皆東鄉太后南鄉王

北鄉相嘉大臣皆西鄉侍坐飲嘉弟為將將卒居宮外酒行太后謂嘉曰南越內屬國之利也而相君苦不便

者何也以激怒使者使者狐疑相杖遂莫敢發嘉見耳

目非是即起而出太后怒欲鉞嘉以矛

集解韋昭曰鉞撞也索隱案字

林鉞音七凶反又吳王

傳鉞殺吳王與此同王止太后嘉遂出分其弟兵就

舍

索隱案謂分取其兵也漢書作介介被也恃也

稱病不肯見王及使者乃陰

與大臣作亂王素無意誅嘉嘉知之以故數月不發太

后有淫行國人不附欲獨誅嘉等力又不能天子聞嘉

不聽王王太后弱孤不能制使者怯無決又以為王王

太后已附漢獨呂嘉為亂不足以興兵欲使莊參以二

千人往使參曰以好往數人足矣以武往二千人無足

以為也辭不可天子罷參也邾壯士

集解徐廣曰縣屬潁川音古洽反正

義今汝州邾城縣

故濟北相韓千秋奮曰以區區之越又有王

太后應獨相呂嘉為害願得勇士二百人必斬嘉以報

於是天子遣千秋

集解徐廣曰為校尉

與王太后弟繆樂將二千

人往入越境呂嘉等乃遂反下令國中曰王年少太后中國人也又與使者亂專欲內屬盡持先王寶器入獻天子以自媚多從人行至長安虜賣以為僮僕取自脫一時之利無顧趙氏社稷為萬世慮計之意乃與其弟將卒攻殺王太后及漢使者遣人告蒼梧秦王及其諸郡縣立明王長男越妻子術陽侯建德為王

集解徐廣曰元鼎四

年以南越王兄越封高昌侯索隱案功臣表術陽屬下邳

而韓千秋兵入破數小邑

其後越直開道給食未至番禺四十里越以兵擊千秋



等遂滅之使人函封漢使者節置塞上

索隱案南康記以為大庾嶺名

塞上好為謾辭謝罪發兵守要害處於是天子曰韓千

秋雖無成功亦軍鋒之冠封其子延年為成安侯

索隱案功

臣表成安屬邦膠樂其姊為王太后首願屬漢封其子廣德為

龍亢侯

索隱案龍亢屬譙國漢書作龔侯服虔作邛晉灼云龔古龍字

乃下赦曰天子

微諸侯力政譏臣不討賊今呂嘉建德等反自立晏如

令罪人及江淮以南

集解徐廣曰淮一作匯也

樓船十萬師

集解應劭曰時

欲擊越非水不至故作大船

往討之元鼎五年秋衛尉

船上施樓故號曰樓船也

路博德為伏波將軍出桂陽下滙水

集解徐廣曰一作滙駟案地理志曰

桂陽有滙水通四會或作淮字索隱劉氏云滙當作滙漢書云下滙水也

主爵都尉楊僕為

樓船將軍出豫章下橫浦故歸義越侯二人

集解張晏曰故越人

降為為戈船下厲將軍

集解徐廣曰厲一作瀨駟案張晏曰越人於水中負人船又有

蛟龍之害故置戈於船下因以為名也應劭曰瀨水流涉上也瓚曰伍子胥書有戈船以載干戈因謂之戈船

也出零陵或下離水

集解徐廣曰在零陵通廣信正義地理志云零陵縣有離水東至廣

信入鬱林九

或抵蒼梧使馳義侯

集解徐廣曰越人也名遺因巴蜀

罪人發夜郎兵

正義曲州協州以南是夜郎國

下牂牁江

正義江出南徼外東通四

會至番禺  
入海也

咸會番禺元鼎六年冬樓船將軍將精卒先

陷尋陝破石門

索隱姚氏云尋陝在始興西三百里近連口也

廣州記石門在番禺縣北二十

里昔呂嘉拒漢積石於江名曰石門又俗云石門水名貪泉飲之則令人變故吳隱之至石門酌水飲乃為歌

也得越船粟因推而前挫越鋒以數萬人待伏波伏波

將軍將罪人道遠會期後與樓船會乃有千餘人遂俱

進樓船居前至番禺建德嘉皆城守樓船自擇便處居

東南面伏波居西北面會暮樓船攻敗越人縱火燒城

越素聞伏波名日暮不知其兵多少伏波乃為營遣使

者招降者賜印復縱令相招樓船力攻燒敵反驅而入

伏波營中犂旦城中皆降伏波

集解徐廣曰呂靜曰犂結也音力奚反結猶連

及逮至也

漢書犂旦為遲旦謂待明也索隱鄒氏云犂一作比比音必至反然犂即比義不煩更釋又解犂黑

也天未明而尚黑也漢書史記亦作遲明遲音稚遲待也亦犂之義

呂嘉建德已夜與其

屬數百人亡入海以船西去伏波又因問所得降者貴

人以知呂嘉所之遣人追之以其故校尉司馬蘇弘得

建德封為海常侯

集解徐廣曰在東萊

越郎

集解徐廣曰南越之郎官

都稽

集

徐廣曰表曰孫都

得嘉封為臨蔡侯

索隱案表屬河內

蒼梧王趙光者越王同姓聞漢兵至及越揭陽令定

集解

韋昭曰揭音其逝反索隱地理志揭陽縣屬南海揭音

桀劉氏音求例反定者令之名也案漢功臣表云定揭陽令意

又別 自定屬漢越桂林監居翁

集解駟案漢書音義曰桂林郡中監姓居

名翁 諭甌駱屬漢

索隱案漢書甌駱三十餘萬口降漢

皆得為侯

索隱案漢書云

光聞漢兵至降封為桃侯揭陽令為安道侯越將畢取

為瞭侯桂林監居翁為湘城侯韋昭云湘城屬堵陽桃

安道瞭三縣皆屬南陽

音遼 戈船下屬將軍兵及馳義侯所發夜郎

兵未下南越已平矣遂為九郡

集解徐廣曰儋耳珠崖南海蒼梧九真鬱林日

南合浦交趾索隱徐伏波將軍益封樓船將軍兵以陷

廣皆據漢書為說

堅為將梁侯自尉佗初王後五世九十三歲而國亡焉  
太史公曰尉佗之王本由任囂遭漢初定列為諸侯隆  
慮離溼疫佗得以益驕甌駱相攻南越動搖漢兵臨境  
嬰齊入朝其後亡國徵自嫪女呂嘉小忠令佗無後樓  
船從欲急傲失惑伏波困窮智慮愈殖因禍為福成敗  
之轉譬若糾墨

索隱述贊曰中原鹿走羣雄莫制漢事西驅越淮南  
裔陸賈聘說尉佗去帝嫪后內朝呂嘉狼戾君臣不  
協卒從  
剿弃

史記卷一百十三

史記卷一百一十三考證

南越尉佗列傳封其子廣德為龍亢侯索隱按龍亢屬  
譙國○臣照按年表索隱曰龍魯邑蕭該云廣德所  
封止是龍有亢者誤也此處索隱注自相矛盾



史記卷一百一十三考證

欽定四庫全書

史記卷一百十四

漢

太

史

令司馬遷撰

宋中郎外兵曹參軍裴駰集解

唐國子博士弘文館學士司馬貞索隱

唐諸王侍讀率府長史張守節正義

東越列傳第五十四

閩越王無諸

集解韋昭曰閩音武巾反東越之別名索隱按說文云閩東越蛇種也故字從虫門

聲音 及越東海王搖者其先皆越王句踐之後也姓騶

氏集解徐廣曰騶一作駱索隱徐廣說是上云駱駝此別云閩不姓騶也秦已并天下皆

廢為君長以其地為閩中郡集解徐廣曰今建安侯官是索隱小顏以為即今之

泉州建安也正義今及諸侯畔秦無諸搖率越歸鄱陽

令吳芮所謂鄱君者也從諸侯滅秦當是之時項籍主

命弗王集解駢案漢書音義曰主號今諸侯不王無諸搖等以故不附楚漢擊項

籍無諸搖率越人佐漢漢五年復立無諸為閩越王王

閩中故地都東冶孝惠三年舉高帝時越功曰閩君搖

功多其民便附乃立搖為東海王

集解應劭曰在吳郡東南濱海云都

東甌

集解徐廣曰今之永寧也索隱姚氏云甌水名永嘉記水出永寧山行三十餘里去郡城五里入江

昔有東甌王都城有亭積石為道今猶在也

世俗號為東甌王後數世至孝景

三年吳王濞反欲從閩越閩越未肯行獨東甌從吳及

吳破東甌受漢購殺吳王丹徒以故皆得不誅歸國吳

王子子駒亡走閩越怨東甌殺其父常勸閩越擊東甌

至建元三年閩越發兵圍東甌東甌食盡困且降乃使

人告急天子天子問太尉田蚡蚡對曰越人相攻擊固

其常又數反覆不足以煩中國往救也自秦時棄弗屬  
於是中大夫莊助詰蚡曰特患力弗能救德弗能覆誠  
能何故棄之且秦舉咸陽而棄之何乃越也今小國以  
窮困來告急天子天子弗振當安所告愬又何以子萬  
國乎上曰太尉未足與計吾初即位不欲出虎符發兵  
郡國乃遣莊助以節發兵會稽會稽太守欲距不為發  
兵助乃斬一司馬諭意指遂發兵浮海救東甌未至閩  
越引兵而去東甌請舉國徙中國乃悉舉衆來處江淮

之間

集解徐廣曰年表曰東甌王廣武侯望率其衆四萬餘人來降家廬江郡索隱徐廣據年表而為說

至建元六年閩越擊南越南越守天子約不敢擅發兵擊而以聞上遣大行王恢出豫章大農韓安國出會稽皆為將軍兵未踰嶺閩越王郢發兵距險其弟餘善乃與相宗族謀曰王以擅發兵擊南越不請故天子兵來誅今漢兵衆彊今即幸勝之後來益多終滅國而止今殺王以謝天子天子聽罷兵固一國完不聽乃力戰不勝即亡入海皆曰善即鋌殺王

索隱劉氏鋌音窻鋌撞也

使使奉其

頭致大行大行曰所為來者誅王今王頭至謝罪不戰

而耘

集解徐廣曰漢書作殞耘義當取耘除或言耘音于粉反此楚人聲重耳隕耘當同音但字有假借

聲有輕重

利莫大焉乃以便宜案兵告大農軍而使使奉王

頭馳報天子詔罷兩將兵曰郢等首惡獨無諸孫繇君

丑不與謀焉

索隱繇音搖繇者邑號丑名也

乃使郎中將立丑為越繇

王奉閩越先祭祀餘善已殺郢威行於國國民多屬竊自立為王繇王不能矯其衆持正天子聞之為餘善不足復興師曰餘善數與郢謀亂而後首誅郢師得不勞

因立餘善為東越王與繇王並處至元鼎五年南越反  
東越王餘善上書請以卒八千人從樓船將軍擊呂嘉  
等兵至揭陽以海風波為解不行持兩端陰使南越及  
漢破番禺不至是時樓船將軍楊僕使使上書願便引  
兵擊東越上曰士卒勞倦不許罷兵令諸校屯豫章梅  
嶺待命集解徐廣曰在會稽界索隱徐說非也案今豫  
章三十里有梅嶺在洪崖山當古驛道此文云  
豫章梅嶺知非會稽也正義括地志云梅嶺在虔化  
縣東北百二十八里虔州漢亦屬豫章郡二所未詳元  
鼎六年秋餘善聞樓船請誅之漢兵臨境且往乃遂反



發兵距漢道號將軍騶力等為吞漢將軍入白沙武林

集解徐廣曰在豫章界索隱案今豫章北二百里接鄱陽界地名白沙有小水入湖名曰白沙沙東南八十里

有武昌亭亭東南三十里地名武林此白沙武林今當閩越之京道梅嶺殺漢三校尉是

時漢使大農張成故山州侯齒集解徐廣曰城陽共王子將屯弗敢

擊却就便處皆坐畏懦誅餘善刻武帝璽自立詐其民

為妄言天子遣橫海將軍韓說出句章索隱鄭氏句音鉤會稽縣也正

義句章故城在越州鄞縣西一百里漢縣浮海從東方往樓船將軍楊僕出

武林中尉王溫舒出梅嶺越侯為戈船下瀨將軍出若

邪白沙

索隱案姚氏云若邪地名今闕正義越州有若耶山若耶溪若如一預州有白沙山蓋從如此

邪白沙東故閩州

元封元年冬咸入東越東越素發兵距險使

徇北將軍守武林敗樓船軍數校尉殺長吏樓船將軍

率錢塘轅終古

正義錢塘杭州縣轅姓終古名

斬徇北將軍為禦兒侯

集解駟案漢書音義曰今吳南亭是也正義禦字今作語語兒鄉在蘇州嘉興縣南七十里臨官道也

自

兵未往故越衍侯吳陽前在漢漢使歸諭餘善餘善弗

聽及橫海將軍先至越衍侯吳陽以其邑七百人反攻

越軍於漢陽從建成侯敖

集解徐廣曰敖東越臣

與其率從繇王

居股謀曰餘善首惡劫守吾屬今漢兵至衆彊計殺餘

善自歸諸將儻幸得脫乃遂俱殺餘善以其衆降橫海

將軍故封繇王居股為東成侯萬戶

索隱韋昭云在九江

封建成

侯教為開陵侯

索隱徐廣云教東越臣韋昭云開陵屬臨淮

封越衍侯吳陽

為北石侯封橫海將軍說為按道侯封橫海校尉福為

繚嫫侯

集解駟案漢書音義曰音遼縈索隱繚嫫縣名服虔曰嫫音瑩劉伯莊音紆縈反

福者

城陽共王子故為海常侯坐法失侯舊從軍無功以宗

室故侯諸將皆無成功莫封東越將多軍

集解駟案漢書音義曰多

軍名也索隱韋昭云多姓軍名也

漢兵至棄其軍降封為無錫侯於是

天子曰東越狹多阻閩越悍數反覆詔軍吏皆將其民徙處江淮間東越地遂虛

太史公曰越雖蠻夷其先豈嘗有大功德於民哉何其久也歷數代常為君王句踐一稱伯然餘善至大逆滅國遷衆其先苗裔繇王居股等猶尚封為萬戶侯由此知越世世為公侯矣蓋禹之餘烈也

索隱述贊曰句踐之裔是曰無諸既席漢寵實因秦餘賜駱為姓閩中是居王瑤之立爰處東隅後嗣不

道自相  
誅鋤

史記卷一百十四

史記卷一百一十四考證

東越列傳秦已并天下皆廢為君長○

臣照

按越為楚

滅子孫分散臣服於楚越世家雖有或為王或為君  
之言其實自相稱署而不得比於宋衛中山之數者  
也秦兼天下罷侯置守六國之後尚不得尺寸地  
矧區區江南海上之越別奉以君長之號乎疑無諸  
與搖皆已廢為庶人陳項兵起乃始糾合義旅闔越  
之民尚思舊德相率景從耳

史記卷一百一十四考證

欽定四庫全書

史記卷一百十五

漢

太

史

令司馬遷撰

宋中郎外兵曹參軍裴駙集解

唐國子博士弘文館學士司馬貞索隱

唐諸王侍讀率府長史張守節正義

朝鮮列傳第五十五

集解張晏曰朝鮮有濕水洌水汕水三水合為洌水疑樂浪朝鮮取名於此也索隱案朝音潮



直驕反鮮音仙以有汕  
水故名也汕一音訕

朝鮮

正義潮仙二音括地志云高驪都平壤城本漢樂浪郡王險城又古云朝鮮地也

王滿者

故燕人也

索隱案漢書滿燕人姓衛擊破朝鮮王而自王之

自始全燕時嘗略

屬真番

集解徐廣曰一作莫遼東有番汗縣番音普寒反索隱始全燕時謂六國燕方全盛之時常略

二國以屬已也應劭云元菟本真番國徐氏云遼東有番汗縣者據地理志而知也朝鮮為置吏

築鄣塞秦滅燕屬遼東外徼漢興為其遠難守復修遼

東故塞至涇水為界

集解駉案漢書音義曰涇音傍沛反正義地理志云涇水出遼東塞

外西南至樂浪縣西入海涇普大反

屬燕燕王盧綰反入匈奴滿亡命

正義

命謂教令聚黨千餘人魁結蠻夷服而東走出塞渡涇水居

秦故空地上下鄣

索隱案地理志樂浪有雲鄣

稍役屬真番朝鮮蠻

夷及故燕齊亡命者王之都王險

集解徐廣曰昌黎有險瀆縣也索隱韋昭

云古邑名應劭注地理志云遼東有險瀆縣朝鮮王舊都瓚云王險城在樂浪郡涇水之東也

會孝惠

高后時天下初定遼東太守即約滿為外臣保塞外蠻

夷無使盜邊諸蠻夷君長欲入見天子勿得禁止以聞

上許之以故滿得兵威財物侵降其旁小邑真番臨屯

皆來服屬

索隱東方小國後以為郡

方數千里

正義括地志云朝鮮高麗貊東沃沮五國

之地國東西千三百里南北二千里在京師東東至大海四百里北至營州界九百二十里南至新羅國六百

里北至靺鞨國千四百里

傳子至孫右渠

正義其孫名也

所誘漢亡人滋多

又未嘗入見真番旁衆國欲上書見天子又擁關不通

元封二年漢使涉何誘諭右渠

索隱誘一作譙說文云譙讓也諭曉也譙音才

笑終不肯奉詔何去至界上臨涓水使御刺殺送何者

索隱即送何之御也

朝鮮裨王長

正義顏師古云長者裨王名也送何至涓水何因刺殺也按裨

王乃將士長

即渡馳入塞

正義入平州榆林關也

遂歸報天子曰

殺朝鮮將上為其名美即不詰

索隱有殺將之美名

拜何為遼東

東部都尉

正義地理志云遼東郡武次縣東部都尉所理也

朝鮮怨何發兵襲

攻殺何天子募罪人擊朝鮮其秋遣樓船將軍楊僕從  
齊浮渤海兵五萬人左將軍荀彘出遼東討右渠右渠  
發兵距險左將軍卒正多率遼東兵先縱敗散多還走  
坐法斬樓船將軍將齊兵七千人先至王險右渠城守  
窺知樓船軍少即出城擊樓船樓船軍敗散走將軍楊  
僕失其衆遁山中十餘日稍求收散卒復聚左將軍擊  
朝鮮涓水西軍未能破自前天子為兩將未有利乃使

衛山因兵威往諭右渠右渠見使者頓首謝願降恐兩將詐殺臣今見信節請服降遣太子入謝獻馬五千匹及饋軍糧人衆萬餘持兵方渡渭水使者及左將軍疑其為變謂太子已服降宜命人毋持兵太子亦疑使者左將軍詐殺之遂不渡渭水復引歸山還報天子天子誅山左將軍破渭水上軍乃前至城下圍其西北樓船亦往會居城南右渠遂堅守城數月未能下左將軍素侍中幸將燕代卒悍乘勝軍多驕樓船將齊卒入海固

已多敗亡其先與右渠戰困辱亡卒卒皆恐將心慙其  
圍右渠嘗持和節左將軍急擊之朝鮮大臣乃陰間使  
人私約降樓船往來言尚未肯決左將軍數與樓船期  
戰樓船欲急就其約不會左將軍亦使人求間卻降下  
朝鮮朝鮮不肯心附樓船以故兩將不相能左將軍心  
意樓船前有失軍罪今與朝鮮私善而又不降疑其有  
反計未敢發天子曰將率不能前及使衛山諭降右渠  
右渠遣太子山使不能刺決與左將軍計相誤卒沮約

今兩將圍城又乖異以故久不決使濟南太守公孫遂  
往征之有便宜得以從事遂至左將軍曰朝鮮當下久  
矣不下者有狀言樓船數期不會具以素所意告遂曰  
今如此不取恐為大害非獨樓船又且與朝鮮共滅吾  
軍遂亦以為然而以節召樓船將軍入左將軍營計事  
即命左將軍麾下執捕樓船將軍并其軍以報天子天  
子誅遂左將軍已并兩軍即急擊朝鮮朝鮮相路人相  
韓陰尼谿相參將軍王唼

集解駟案漢書音義曰凡五人也戎狄不知官紀故皆稱

相映音類索隱路人漁陽縣人如淳云相其國相路人名也映一音協

相與謀曰始欲降

樓船樓船今執獨左將軍并將戰益急恐不能與戰王

又不肯降陰映路人皆亡降漢路人道死元封三年夏

尼谿相參乃使人殺朝鮮王右渠來降王險城未下故

右渠之大臣成已又反復攻吏左將軍使右渠子長

集解

徐廣曰表云長路漢書表云長路音各索隱路音姑落反

降相路人之子最

索隱最名路人

之子

告諭其民誅成已以故遂定朝鮮為四郡

集解駟案真番

臨屯樂浪

封參為瀘清侯

集解韋昭曰屬齊索隱顧氏瀘音獲

陰為菽首



侯

集解韋昭曰屬渤海索隱萩音秋苴音子餘反

映為平州侯

集解韋昭曰屬梁父

長為

幾侯

集解韋昭曰屬河東索隱幾縣名

最以父死頗有功為溫陽侯

集解

韋昭曰屬齊

左將軍徵至坐爭功相嫉乖計棄市樓船將軍

亦坐兵至列口當待左將軍擅先縱失亡多當誅贖為

庶人

索隱蘇林云列口縣名度海先得之

太史公曰右渠負固國以絕祀涉何誣功為兵發首樓


船將狹

集解徐廣曰言其所將卒狹少

及難離咎悔失番禺乃反見疑

荀彘爭勞與遂皆誅兩軍俱辱將率莫侯矣

索隱述贊曰衛滿燕人朝鮮是王王險置都路人作  
相右渠首菟涉何調上兆禍自斯狐疑二將山遂伏  
法紛紜  
無狀



史記卷一百十五

史記卷一百一十五考證

朝鮮列傳朝鮮相路人相韓陰尼谿相參將軍王暎集  
解漢書音義曰凡五人也。○凌稚隆曰按師古云相  
路人一相韓陰二尼谿相參三將軍王暎四應氏云  
五人誤也

史記卷一百一十五考證

欽定四庫全書

史部  
史記卷一百十六

詳校官侍讀學士<sub>臣</sub>陸伯崐

洗馬<sub>臣</sub>王垣修覆勘

覆校官待詔<sub>臣</sub>胡士震

校對官中書<sub>臣</sub>高 中

謄錄舉人<sub>臣</sub>沈以顯

欽定四庫全書

史記卷一百十六

漢

太

史

今司馬遷撰

宋中郎外兵曹參軍裴駙集解

唐國子博士弘文館學士司馬貞索隱

唐諸王侍讀率府長史張守節正義

西南夷列傳第五十六

西南夷君長

正義在蜀之南

以什數夜郎最大

索隱劉氏數音所具反鄒氏音

所主反荀悅云夜郎犍為屬國也韋昭云漢為縣屬牂牁案後漢書云夜郎東接交趾其地在胡南其君長本

出於竹以竹而為姓也正義今瀘州南大江兩岸協州曲州本夜郎國其西靡莫之屬正義

在蜀南以下及西也靡非在姚州北去京西南四千九百三十五里即靡莫之夷以什數滇最

大名滇解如淳曰滇音顛滇馬出其國也索隱靡莫夷邑名滇與同姓也崔浩云滇後為縣屬越嶲太守所理

也正義昆州郎州等本滇國去京西五千三百七十里也自滇以北君長以什數邛

都最大此皆魑結耕田有邑聚索隱魑漢書作推音直追反結音計其外

西自同師以東集解韋昭曰邑名也北至檮榆集解韋昭曰在

益州檮音葉正義上音檮檮澤在靡北百餘里名為檮漢檮榆縣在澤西益都靡非本桑榆王屬國也



昆明

集解徐廣曰永昌有僞唐縣索隱崔浩云僞昆明二國名韋昭云益州縣正義僞音髓今澧州也昆明

明僞州縣蓋南接昆明之地因名也

皆編髮隨蓄遷徙

正義編步典反蓄許六反皆僞昆明

之俗也

母常處母君長地方可數千里自僞以東北君長

以什數徙笮都最大

集解徐廣曰徙在漢嘉笮音昨在越僞索隱服虔云徙笮二國名韋

昭云徙縣在蜀笮縣在越僞正義徙音斯牯地志云笮州本西蜀徼外白猫羗僞地理志云徙縣也華陽國志

雅州邛邛邰山本名邛笮山故邛人笮人界

自笮以東北君長以什數冉駹最

大

索隱案應劭云汶江郡本冉駹音亡江反正義牯地志云蜀西徼外羗茂州冉州本冉駹國地也後漢書

云冉駹其山有六夷七羗九氐各有部落也

其俗或土著或移徙在蜀之西

自冉駹以東北君長以什數白馬最大

索隱案夷邑名即白馬氏也正

義括地志曰隴右成州武州皆白馬氏其豪族楊氏居成州仇池山上

皆氏類也此皆巴

蜀西南外蠻夷也始楚威王時使將軍莊躡

正義躡其畧反郎州

昆州即莊躡所王

將兵循江上畧巴蜀黔中以西莊躡者故楚

莊王苗裔也

索隱躡音矩灼反楚莊王弟為盜者

躡至滇池地方三百里

索隱地理志益州滇池縣

澤在西北後漢書云其池水源深廣而更淺狹有似倒流故謂滇池正義括地志云

滇池澤在昆州晉寧縣西南三十里其水源深廣而更淺狹有似倒流故謂滇池

旁平地肥饒

數千里以兵威定屬楚欲歸報會秦擊奪楚巴黔中郡

道塞不通因還以其衆王滇變服從其俗以長之秦時

常頰

集解案音案

畧通五尺道

案隱謂棧道廣五尺正義括地志云五尺道在郎州顏師

古云其處險阨故道繞廣五尺如淳云道廣五尺也

諸此國頗置吏焉十餘歲秦

滅及漢興皆棄此國而開蜀故徼巴蜀民或竊出商貨

取其笮馬犍僮

正義今益州南戎州北臨大江古犍國

髦牛以此巴蜀殷

富

索隱韋昭云犍屬犍為音蒲北反服虔曰舊京師有犍婢

建元六年大行王恢擊

東越東越殺王郢以報恢因兵威使番陽令

正義音婆

唐

蒙風指曉南越南越食蒙蜀枸醬

集解徐廣曰枸一作蒟音窶駟案漢書音

義曰枸木似穀樹其葉似桑葉用其葉作醬酢美蜀人  
以為珍味索隱案晉灼枸音矩劉德云枸樹如桑其樵  
長二三寸味酢取其實以為醬美小顏云枸者緣木而  
生非樹也今蜀土家出枸實不長二三寸味辛似薑不  
酢劉說非也廣志云枸色黑蒙問所從來曰道西北牂  
味辛下氣消穀窶音求羽反

牂正義崔浩云牂牁繫船杙也常氏華陽國志云楚頃  
襄王時遣莊躡伐夜郎軍至且蘭牂船於岸而步戰  
既滅夜郎以且蘭有牂船

牂牁江廣數里出番禺城下

柯處乃改其名為牂牁

蒙歸至長安問蜀賈人賈人曰獨蜀出枸醬多持竊出  
市夜郎夜郎者臨牂牁江江廣百餘步足以行船南越  
以財物役屬夜郎西至同師然亦不能臣使也蒙乃上

書說上曰南越王黃屋左纛地東西萬餘里名為外臣  
實一州主也今以長沙豫章往水道多絕難行竊聞夜  
郎所有精兵可得十餘萬浮船牂牁江出其不意此制  
越一奇也誠以漢之彊巴蜀之饒通夜郎道為置吏易  
其上許之乃拜蒙為郎中將將千人食重萬餘人索隱  
糧及輜重車  
也音持用反從巴蜀笮闕入遂見夜郎侯多同蒙厚賜  
喻以威德約為置吏使其子為令夜郎旁小邑皆貪漢  
繒帛以為漢道險終不能有也乃且聽蒙約還報乃以

為犍為郡發巴蜀卒治道自犍道指牂牁江

索隱崔浩云牂牁繫

船牁以為地名道猶從也地理志夜郎又有牂水東至南海四會入海此牂牁江也

蜀人司馬相

如亦言西夷邛笮可置郡使相如以郎中將往喻皆如

南夷為置一都尉十餘縣屬蜀當是時巴蜀四郡

集解徐廣

曰漢中巴郡廣漢蜀郡

通西南夷道成轉相饒數歲道不通士罷

餓離濕死者甚衆西南夷又數反發兵興擊耗費無功

上患之使公孫弘往視問焉還對言其不便及弘為御

史大夫是時方築朔方以據河遂胡弘因數言西南夷

害可且罷專力事匈奴上罷西夷獨置南夷夜郎兩縣

一都尉

集解徐廣曰元光六年南夷始置郵亭

稍令犍為自葆就

正義令犍為自

葆守而漸修成其郡縣也

及元狩元年博望侯張騫使大夏來言居

大夏時見蜀布邛竹杖

集解韋昭曰邛縣之竹屬蜀犢曰邛山名此竹節高實中可作

杖使問所從來曰從東南身毒國

集解徐廣曰字或作竺漢書直云身毒史

記一本作乾毒駟案漢書音義曰一名天竺則浮屠胡是也索隱身音捐毒音為小顏亦曰捐薦也

可數

千里得蜀賈人市或聞邛西可二千里有身毒國騫因

盛言大夏在漢西南慕中國患匈奴隔其道誠通蜀身

毒國道便近有利無害於是天子乃令王然于栢始昌

呂越人等使間出西夷西指求身毒國至滇滇王嘗羌

集解徐廣曰  
嘗一作賞

乃留為求道西十餘輩歲餘皆閉昆明

集解

如淳曰為昆明所閉道正義  
昆明在今雋州南昆縣是也

莫能通身毒國滇王與漢

使者言曰漢孰與我大及夜郎侯亦然以道不通故各

自以為一州主不知漢廣大使者還因盛言滇大國足

事親附天子注意焉及至南越反上使馳義侯因犍為

發南夷兵且蘭君恐遠行旁國虜其老弱

索隱且音子  
餘反小國名



也後為縣  
屬牂牁

乃與其衆反殺使者及犍為太守漢乃發巴

蜀罪人嘗擊南越者八校尉擊破之會越已破漢八校

尉不下即引兵還行誅頭蘭

索隱即  
且蘭也

頭蘭常隔滇道者

也已平頭蘭遂平南夷為牂牁郡夜郎侯始倚南越南

越已滅會還誅反者夜郎遂入朝上以為夜郎王南越

破後及漢誅且蘭邛君并殺笮侯冉駹皆振恐請臣置

吏乃以邛都為越犛郡笮都為沈犁郡冉駹為汶山郡

集解應劭曰  
今蜀郡岷江

廣漢西白馬為武都郡上使王然于以越

破及誅南夷兵威風喻滇王入朝滇王者其衆數萬人其旁東北有勞漫靡莫皆同姓相扶未肯聽勞漫靡莫數侵犯使者吏卒元封二年天子發巴蜀兵擊滅勞漫

靡莫

索隱二國與滇王同姓

以兵臨滇滇王始首善以故弗誅滇

王離難西南夷舉國降請置吏入朝於是以為益州郡賜滇王王印復長其民西南夷君長以百數獨夜郎滇受王印滇小邑最寵焉

太史公曰楚之先豈有天祿哉在周為文王師封楚及

周之衰地稱五千里秦滅諸侯唯楚苗裔尚有滇王漢  
誅西南夷國多滅矣唯滇復為寵王然南夷之端見枸

醬番禺大夏杖叩竹西夷後揃剽分二方

集解駢案漢書音義曰揃

音翦索隱揃謂被分割也剽音匹妙反言西夷後  
被揃割遂剽居西南二方各屬郡縣剽亦分義卒為

七郡

集解徐廣曰犍為牂牁越嵩  
益州武都沈犁汶山地也

索隱述贊曰西南外徼莊蹻首通漢因大夏乃命唐  
蒙勞漫靡莫異俗殊風夜郎最大邛笮稱雄及置郡

縣萬代

推功

史記卷一百十六

史記卷一百一十六考證

西南夷列傳自駕以東北君長以什數徙筰都最大集

解徐廣曰徙在漢嘉筰音昨在越駕○

臣照

按華陽

國志曰汶山曰夷南中曰昆明漢嘉越駕曰筰蜀曰

邛與徐所說不同

乃拜蒙為郎中將○華陽國志作中郎將

史記卷一百一十六考證